





葑園詩藁目錄 卷下

今體詩

片雲石

南山十八澗

白沙泉

暮汎同洪昉思黃芝九

將遊徑山宿北墅僧舍夜聞雨聲舍弟皖輪有作

次韻

冒雨入禹航

雙溪次皖輪韻

徑山寺訪別菴和上三首

瀑布次皖輪韻

鶯窠崖次皖輪韻

戴師曾外舅招飲七寶山莊

江行

韜光同閩百詩先生次韻





次韻謝東山先生春深坐雨

葯園送春同毛西河太史謝東山朱贊皇郭河九

洪昉思姚立方王魯齋蘇月槎沈瑤岑朱方來

顧搢玉周層巖王履方柴陞升錢景舒張蘭佩

胡逸蘅雲浦曉蒼家兄寶崖快亭弟皖輪分賦

宿中天竺用香山韻同李寅伯

送寶崖兄重赴淮揚 胡雲浦招同西湖讌集

雲浦濯足圖二首 采蓮絕句

寄朱竹垞太史 江頭吟

書王昭平先生殉難錄後

跋東山先生豫遊紀 秋夜

跋東山竹枝詞四首 自十八澗至理安寺

翁山看桂 宿鉢池菴二首

松顛閣

南高峰西下廢寺數椽寺後怪石數十疊遊倦憩

此多心賞焉鉢池僧白厓請題於石

薄暮憩龍井石上 飲闇園大兄水閣

寄郭河九 寄莊書田

江上送鄭義門

徐孫謀爲余畫秋水園圖嚴學川寫照每景各繫



一絕凡二十首

郭河九擁書下酒圖三首

瓶花齋集飲同王子揆馮山公虞季陶金小郊柴

陛升鄭義門沈厚餘家寶崖分得寒字

題黃主一擬明史胡宗憲傳四首

鄭圃田遺像二首

巖螺亭自寫秋山觀瀑圖二首

瓶花辭除夜作四首 湖上效嬉春體

清明後三日集瓶花齋同蔡九霞先生朱贊皇洪

昉思項霜田張錦龍顧天臣楊東崖王魯齋柴

陛升金小郊胡雲浦錢景舒家寶崖限韻

几上落花和金小郊

買擔頭牡丹二本一本分植顧天臣挹翠軒

竹籬補花 畫石爲鄭子元題

宿河渚就山堂集字 汪虎臣姊聶藏畫五首

少年 歲月

同雪園兄夜飲桂花下即送還吳門

即席 有約二首寄朱贊皇

重有約三首寄贊皇 王仲山青溪漁父圖

茗溪舟中爲禹徵二姪題畫二首

訪蓮花莊故址三首 畫溪黎雲



春湖和趙驂期中翰 春湖答王雄飛

瓶花齋讌集招同張超然顧俠君洪昉思王赤抒  
許莘野項霜田顧天臣汪無亢周層巖王握蒼  
顧搢玉江陞交次顏家寶崖快亭皖輪分韻得  
深字

六月一日向功來趙驂期過瓶花齋看菊

九日葛嶺同毛鶴舫陸雲士王丹麓魯齋蘇月槎  
諸詞宿用魯齋韻 訪家侍御青壇先生二首

駕湖席上戲題八首 綠萼梅

張蘭佩消夏圖二首 答裘殷玉

石臣兄葡萄畫卷

畫丁香花爲柏侍衛題三首

南巡迎鑾詩四首

乙酉四月十日

上自西湖回鑾 臣焯 於杭關謝村送 駕蒙 賜御箭

命赴吳門 行宮至十八日辭歸恭進紀 恩詩八首

法螺 千尺雪

靈巖 琴臺

穹窿 鄧尉

白雲泉 鄒念尊太湖采蓴圖



虎丘舟中同鄭義門 寶崖兄桐陰點筆圖

畫石贈石臣兄尤時從黃山還

書藍田叔畫蘭卷後贈石臣兄二首

答韓寄菴 蔣靜山秋吟圖

陳楚白漱香圖

乙酉園中硃卷爲同考吳江廣文夏虛舟先生所

薦賦呈八首 江上

曾記

竹墩訪沈厚餘留飲賜書堂

雉城訪萬玉菴古梅花殘矣二首

答贈徐象求 西湖讌集答徐象求

畫竹贈吳興友二首 畫草

紫白山人松根把卷圖二首

題張銘軒山樓二首 項霜田秋樹讀書圖二首

湖上晚歸同汪次顏

上相國京江張夫子百二十韻

泥美人和震六上人 送震六上人還南海三首

送陸鶴亭之孝豐廣文次留別韻四首

題徐廷一園亭 跋沈殊亭西湖詩集

跋王鍾玉惹憐詞 一片雲石二首



憶杖圖二首

謝王獻斯姊聿貽端江研四首

贈家師石

度歲雜感十六首

畫蘭絕句

沈斐英照三首

落梅同金仰亭朱贊皇舍弟皖輪分韻

王恂菴石榴蓮蓬圖二首

查二瞻臨米畫冊二首

胡容安與女史堵心霞合畫花卉冊

寫柳圖送戴右衡

畫鳳仙花二首

沈殊亭照

潮音寺次何旋吉明府韻

鐵夫和上雲根道影二首

鑒閣五首

題朱道周詩集

顧餘冬對鏡自寫影三首

客壺山草堂與雪園兄夜話二首

夜上虎丘寺二首

陳遺山招飲觀劇十二首

寒月芳潤堂分賦

芳潤堂看牡丹同蔣芳似金最末朱贊皇秦函三

含貞繆敬思朝曦家學山分韻

為劉新堂題其尊人葵符先生遺照二首

九日陳遺山招集虎丘舟中四首



宿壺山草堂浹旬歸後却寄雪園兄二首

記夢

葯園詩藁卷下目錄

葯園今體詩

片雲石

錢唐 吳焯 尺鳧

怪石驚天立羣山靈氣鍾還疑挾風雨直欲起蛟龍夜  
吸月光濕曉飛雲影重芙蓉七十葉可有此奇峰

南山十八澗

南山十八澗澗澗是鳴琴祇覺秋風滿誰知淥水深溪  
蘿牽翠帶石筍削青簪一步一回首悠然獨賞心

白沙泉

纔度棲霞峽來尋白乳泉雲生石鏡裏山斷玉潭邊留



客賞秋月為琴彈水仙老僧頻汲取松下剩寒煙

暮汎同洪昉思黃芝九

三客汎孤舟人疑赤壁遊月生千嶂夕風起一湖秋

將遊徑山宿北墅僧舍夜聞雨聲舍弟皖輪有作

次韻

便欲揚舲阻晚關花宮留宿雨潺潺話深燈火三人榻

夢繞煙雲兩徑山虎迹漫違廉吏興坡公遊徑山詩中語龍髯豈讓

老僧攀明朝戴笠登峰頂蹋遍重霄未擬還

冒雨入禹航

信宿尋山去衝波下小船雲低沉白雨樹老出蒼煙絕

似驚心鳥何如縮項鰻橫塘五十里一水接長天

雙溪次皖輪韻

百里雙流匯此方修篁合澗鬱相望雲生石脚水痕白

日射煙頭山氣黃不少遊魚衝激灩澦儘多啼鳥弄微茫

行人已入桃源路何必前溪問權郎

徑山寺訪別菴和尚三首

久羨名藍勝盤旋入翠微風聲鳴虎窟雲氣濕鮫扉繞

寺五峰立當門雙徑圍前賢栖隱地吾意亦忘歸張子韶隱此

一徑接天門禪林此地尊草香多鳳尾竹長盡龍孫石

起仙人掌泉傾玉女盆靜中清籟發鐘鼓月黃昏



猿鶴棲香國雲煙冷梵宮傳燈思慧祖問法憶蘇公地  
與人爭重山將水不窮三千舊樓閣重許插虛空

瀑布次皖輪韻

風雨激雷霆飛濤下翠屏猿啼雲不散龍浴水猶腥仄  
徑如懸棧危峰似隕星豈辭歸海遠長喜在山青

鶯窠崖次皖輪韻

峭壁驚千仞危崖俯萬重天風墮飛鳥瀑水濯寒松雲  
宿幾時石煙迷何處鐘攜將斑竹杖來上碧霄峰

戴師曾外舅招飲七寶山莊

湖水湖山入畫屏翛然高閣俯空青一頭馱石流星伏

百尺虬松驟雨腥顧曲愛聽新樂府當筵能記舊觴銘  
阿翁漫說山居淺勝我城東小竹扃

江行

巖瀕灘頭第一灣鳴榔處處候潮還東來風挾海門雨  
西去浪吞江上山怪石沉沙含白齒靈楓倚岸露朱顏  
魚鰕向晚羣爭市誰信孤舟釣叟閒

韜光同閣百詩先生次韻

仄徑隨巖轉攀登入翠微雲煙互吞吐日月孕光輝危  
石纏藤蔓奔泉濕竹衣高人清話久池上雨頻飛

次韻謝東山先生春深坐雨



容易韶光到十分輕寒猶自擁爐熏丁香簇簇愁中雨  
乙鳥飛飛夢裏雲滿架舊書消蠹粉平池新漲起鱗紋  
白頭也覺青春老金縷歌聲不忍聞

葯園送春同毛西河太史謝東山朱贊皇郭河九

洪昉思姚立方王魯齋蘇月槎沈瑤岑朱方來

顧搢玉周層巖王履方柴陞升錢景舒張蘭佩

胡逸蘅雲浦曉蒼家兄寶崖快亭弟皖輪分賦

忽忽春光九十過翻從高會惜蹉跎哺成巢燕催鷓鴣  
老盡林花長薜蘿正藉玉臺詩思豔且判金谷醉顏酡  
游絲縱使垂千尺欲繫斜陽柰晚何

宿中天竺用香山韻同李寅伯

橋迴一徑接籬門三竺山從此地分瀑水常飛溪上雨  
天風不斷樹頭雲倦隨幽鳥歸林宿靜愛清鐘入夜聞  
散步迴廊巖月上羅衣涼透白紛紛

送寶崖兄重赴淮揚

漫惜征途千里遙攜尊重與話河橋青山舊向詩中識  
明月新從客裏邀夾岸雲遮隋苑柳一帆風趁廣陵潮  
何當趙嘏樓同倚長笛橫吹破寂寥

胡雲浦招同西湖讌集

黃梅雨過湖光幽蘭槩桂擢天際游隄短隄長野漲合



山南山北晴雲流碧筒轟飲不辭倦玉版苦吟猶未休  
白髮老成盡扶醉一時風雅憑君收

雲浦濯足圖二首

一帶垂楊低拂水有人濯足清江裏清江面面撲涼風  
風散荷香香不已

扁舟也寫捕魚圖君似鄱陽我太湖七十二點青螺好

爭敵彭郎大小姑

圖有雙鬟時余適  
畫太湖垂釣小照

采蓮絕句

采采芙蓉欲采時大家齊唱采蓮詞相將蕩槳入蓮葉  
一片香風人不知

寄朱竹垞太史

曾邀夜半撤金蓮蓬閣投簪未暮年誰使山中閒宰相  
自知林下即神仙芸香好護書三萬石凍常消斗十千  
猶記城西相送日楊花飛雪斷橋邊

江頭

海門潮信疾如雷衝圻江塘亦可哀一自婆留神鏃盡  
何人生射海潮回

書王昭平先生殉難錄後

請纓一慟淚潺湲空有封章慘聖顏駿馬不鳴風瑟瑟  
寶刀欲試土斑斑已判絕脰酬亡國未放遊魂戀故山



愁絕春郊寒食節子規啼血白楊間

跋東山先生豫遊紀

牢落江山一卷收非同王粲賦登樓青雲早散京華夢  
白髮聊爲洛下遊王氣銷沉空艮嶽中原形勝屬商丘  
行蹤處處君能記回首西風又十秋

秋夜

悲秋物物何關情每夜把杯過二更鴻鴈不來月皎潔  
衣裳未授風淒清湘簾篩亂竹枝影金井滴殘梧葉聲  
燈炮欲眠剛就枕又聽笳吹鳴高城

跋東山竹枝詞四首

西湖漫數鐵崖詞直繼三巴古竹枝湖北湖南都唱遍  
相逢爛醉六橋時

六代銷沉煙水空內家休唱大江東桓伊此去無人識  
花落青溪一夜風

蘇臺十曲付歌喉金粟香中上虎丘不戀絳華絃管地  
期君七十二峰秋

蓬萊山館最清涼知在鑑湖九曲傍一艇高歌懷賀監  
蘋花菱葉戲鴛鴦

自十八澗至理安寺

招攜喜共大茅君

雪鴻先生

捫葛攀藤澗路分藜杖撥開荒



徑葉芒屨蹋遍亂山雲巖敲石脚穿籬出風勒泉聲隔  
樹聞不是逢僧貪啜茗愛憑高閣送斜曛

翁山看桂

尋遍朝嵐又夕陰小山今日豁幽襟那知身在衆香國  
不覺衣沾幾粒金采藥何時來築室支筇有客獨攜琴  
一年一度看花老愁對西風思不禁

宿鉢池菴二首

我與煙霞有宿盟今宵偏覺夢魂清燈微殿壁看明滅  
葉下山蹊聽重輕寒欲授衣當九月碁方罷局已三更  
道人不惜茶瓜供願向陂陀十日行

一入深山恐不深何堪秋氣轉蕭森曉看石磳霜枯艸  
夜聽巖坳獸戮禽高下雲根憑倦倚潺湲澗水助沉吟  
那須惠遠重開社始識蓮花不染心

松顛閣

秋風吹客上層臺獨立松顛絕點埃山勢直移高閣去  
濤聲橫截大江來冥冥樹色疑將合幕幕巖陰肯放開  
却笑老僧關不住白雲飛出到溪隈

南高峰西下廢寺數椽寺後怪石數十疊遊倦憩  
此多心賞焉鉢池僧白厓請題於石

竹竿折作過頭杖箬葉裁成覆頂冠蹋遍南山尋怪石



偶逢野寺倚危闌雲奇忽訝衝崖立天險還疑入峽看  
獨是客來留不得茅茨一半已摧殘

薄暮憩龍井石上

為愛看山緩步行夕陽初下晚煙橫欲從雲石依巖宿  
賒取風篁聽雨生魚鼓遠沉穿水濕龕燈微露隔籬明  
須知坡老低徊處高枕松寮夢亦清

飲闍園大兄水閣

尋到東籬菊已殘何妨蕭閣共凭闌高城吹角夕陽下  
飛鳥帶波秋水寒苔軟紋深留鶴印楓敲根老插魚竿  
棲遲不用重招隱弘景清時早挂冠

寄郭河九

七閩遠道悵間關聞說河陽一騎還何地高懸名士榻

有人飽看故園山江南薊北應同憶

兩立贊皇  
俱各散去

丁卯春申

尚此間謂不器  
北亭記得送春花月下曲中楊柳為君攀

寄莊書田

曾把南華讀幾篇莊生風味故依然祇愁人去將三月  
莫謂交疎又一年夜雨寒燈憐遠別秋風落木想高眠  
近來怕蹋城西路為憶停舟聽采蓮

江上送鄭義門

去年湖上逢君日柳葉如眉覆釣磯今日江邊辭我處



雪花似掌撲征衣雲迷古渡千山沒潮落平沙一鴈飛  
我亦高堂垂白髮相期長守故園扉

徐孫謀為余畫秋水園圖嚴學川寫照每景各繫

一絕凡二十首

秋水蒼茫浸碧天柴門開處景翛然箇中分得詩人意

華子岡頭舊輞川兼葭渚

深深楊柳淡秋光颯颯寒聲到草堂讀罷黃庭新芥熟

鑪煙輕裊一簾香深柳書堂

曲護疎籬石徑微秋深何處覓芳菲藤蘿不向霜風老

碎作寒花點翠衣青蘿逕

時向亭南閒徙倚攜琴一曲彈流水月光衝碎瀑花間

樹色遙飛晴雪裏聽雪亭

一過重陽秋老去貪看秋色勝春華冷紅莫被驚風掃

留襯朝霞與暮霞冷楓軒

松筠深鎖小樓孤翠影飛來乍有無最好吟詩向清曉

鶴聲一一上高梧寒翠樓

簞管幾個影離離不管秋來宋玉悲蕭瑟最憐明月下

涼颼先許夢魂知響露廊

小廬儘足寄高閒薜荔陰中日掩關待取裁衣採芝去

看他無數白雲山薜荔館



綠雲低護碧闌干，午夜風淒雨未殘。却似當年趙松雪，  
蕉林斜抱玉琴彈。蕉林竹屋

叢菊開殘秋寂寥，籬門空閉雨瀟瀟。白衣不識陶家徑，

細草寒煙伏板橋。菊籬

滿徑輕陰網夕曛，博山煙煖正氤氳。聲聲歸鳥樓猶未，

亂蹋松尖一片雲。松雲齋

最是山人好與居，翩翩刷羽立庭除。一聲孤唳清無比，

趁我鈎簾點易書。鶴陂

閒身只合共鳧鷖，暮雨朝煙一處栖。可惜秋花等閒發，

殘紅零亂夕陽西。蓼花汀

陸居非屋舟非水，雅稱高眠自在歌。莫笑萍蹤飄泊甚，

乘風直欲犯星河。萍舫

手執蒙莊秋水辭，也知予樂在深池。更饒好處閒來往，

花鴨文鵝白鷺鷥。秋水茅堂

聽月如聞月有聲，瓊漿持向玉杯傾。分明昨夜遊仙夢，

手挽銀河洗太清。凌秋閣

一夜天香白滿林，小山有客獨披襟。秋來常就煙霞宿，

狼藉西風粟粟金。香白榭

層臺百尺勢凌空，海日遙迎若木東。好御天風登絕頂，

一聲長嘯白雲中。霏紅臺



開遍蘆花雪幾層水門月上理魚罾  
聲聲橫笛風吹斷人立平沙一點燈

秋雪激

閒雲野鶴任相親白苧秋衣烏角巾  
不用求仙三島上此中煙水屬斯人

瀛壺

郭河九擁書下酒圖三首

似是羲皇以上人科頭瀟灑露天眞  
何愁白髮三千丈恐負君家折角巾

豈是前身一酒星玉山朗照眼長青  
吾生願向糟丘老只恐逢君醉不醒

漫支鶴俸市官醅曾記離騷幾葉開  
滿架藏書吾欲借

也應先送一甌來

瓶花齋集飲同王子揆馮山公虞季陶金小郊柴

陛升鄭義門沈厚餘家寶崖分得寒字

編茅夾枳遮平欄草堂南負金風寒霜落半壓紅橘柚  
月生斜射青琅玕宋玉一秋慣蕭瑟陶潛三徑何叢殘  
賴有觥船往來捷白波卷盡興未闌

題黃主一擬明史胡宗憲傳四首

緩帶輕裘百戰中旌旗直捲漸江風  
妖氛旣滅身難保一片精靈海嶠東

書生偏有伏波才不向沙場死更哀  
豈爲功成懼黨錮



年年故鬼哭西臺

吳越生全十一州殘碑有淚幾時收龍泉祇合埋豐獄  
空放寒光射斗牛

封章幾上拆風波慘動龍顏可柰何未滅忠魂青簡在  
英雄往事托悲歌

鄭圃田遺像二首

太湖七十二煙鬟角里先生自愛山獨策瘦藤何處去  
白雲飛出不知還

片縑零落惜風塵林木叢中半露身怪得石田誇潑墨  
殘山剩水付斯人

石田畫補  
像其中

巖螺亭自寫秋山觀瀑圖二首

尋遍秋林入翠微籜巾芒屨薜蘿衣西湖亦算佳山水  
只少懸泉一道飛

巉巖陡轉暗蒙茸指點濤聲下碧空我昨夢遊天姥去  
也曾絕頂御天風

時余適圖夢  
遊天姥小影

瓶花辭除夜作四首

一尊椒酒酌花神向囑瓶中早洩春莫被東風齊著力  
案頭常與護香鱗

山茶初放水仙開幾點黃梅間白梅

蠟梅名  
黃梅

我昨南山攜

蠟屐幽香採得洞中來

水樂洞蒸  
蘭即放



草堂新葺舊牆東人度殘年寂寞中  
霜隕寒林葉飛盡猶餘一顆洞庭紅

不用焚香供十友也應擊鼓笑花奴  
何時乞與黃荃手更寫瓶花第二圖

湖上效嬉春體

最好西湖二月時湖頭何事蹋青遲  
水添鴨綠青銅鏡酒汎鵝黃白玉卮  
芳草有情鋪繡褥殘花無力裊晴絲  
倚闌忽動驚心處人爲傷春力不支

清明後三日集瓶花齋同蔡九霞先生朱贊皇洪  
昉思項霜田張錦龍顧天臣楊東崖王魯齋柴

陞升金小郊胡雲浦錢景舒家寶崖限韻

可惜韶光一半陰寒風吹雨過平林  
漫辭剪燭分詩久不厭看花對酒深  
小徑苔滋添屐印曲廊香散上衣襟  
就中遺老江南客喜得留歡愜素心

几上落花和金小郊

拂淨烏皮倚曲櫺曉乘新雨浸銅瓶  
一枝紅老春難勒幾點香銷夢未醒  
繡幕半垂光斂斂銀燈高剔影星星  
早知紛入愁人思留與長門盡日扃

買擔頭牡丹二本一本顧天臣分植挹翠軒

屈指花風到牡丹一枝留植惜春殘  
孤栖自恨新分寵



相見誰憐舊合歡香趁露華凝繡幄影和月彩上雕闌  
由來國色非凡品魏紫姚黃兩地看

竹籬補花

藥闌檢點費分司翠竹屏添一兩枝除架正宜新雨後  
養花須及暮春時斜穿蛺蝶雌雄翅細拂蠨蛸子母絲  
早被姮娥暗偷取方空踈影上階墀

畫石爲鄭子元題

靈蹤髣髴符離石袖底持來日日看曉起淡飛雲影薄  
夜深微吸月光寒

宿河渚就山堂集字

園筍無多味邛醪不上顏燈青殘夜雨雲白隔溪山

汪虎臣姊葺藏畫五首

蒼戟千莖石一拳寫來盆盎亦天然香山人去無消息  
九節青青不記年

細剪靈苗手自栽莫令生處雜蒿萊神仙豈少茹芝朮

親見菖花幾度開

右石田  
菖蒲

從來逸品勝神品沒骨徐生也不如展卷忽驚風雨落  
分明一筆草顛書

物態生機總逼真就中一段倍風神磷磷小石如兒子  
矗矗孤峰似丈人



平生瀟灑是生涯笑殺丹青號作家十箇磁盆堆塚甚  
緣何更寫一瓶花

右白陽  
盆景

少年

小市門東草帶煙香風吹老落花天驕嘶駿馬斜陽下  
爛醉朱樓大道邊狎客馮陵按玉叟妖姬調笑索金錢  
可憐堂上千金子却學幽并惡少年

歲月

歲月難迴駛馬韁生涯遊戲少年場名公詎肯羞王勃  
稚子還應笑謝莊但得從人誇了了莫令先自怪堂堂  
五陵豪客休相問多分蓬門碧草荒

同雪園兄夜飲桂花下即送還吳門

寒燈清酒話深更怪底歡愁此夜并月沒鴈歸猶見影  
露涼花謝不聞聲祇緣別易心旌颺莫爲傷多鬢雪生  
况是一川秋瑟瑟津亭長短倍關情

即席

每向歡場一破愁淒清法曲按梁州玉笙宛轉銀箏促  
都入梧桐夜雨秋

有約二首寄朱贊皇

有約匡山隱仍爲薄海遊風塵空袒褐飄泊任孤舟雪  
鬢雙親老霜燈獨客愁燕雲一回首應悔十年秋



濩落人間世論交那得真可憐  
河漢月偏照別離人殘  
夢西風斷哀鴻午夜頻  
殷勤托雙鯉好爲到江濱

重有約三首寄贊皇

相逢才七夕相隔又三旬  
日晷空移影燈花故惱人  
開緘頻問使掃榻怕生塵  
夜夜瞿曇夢伊誰惜苦辛  
一見復參商相思何太長  
寒風吹暮雨遊子寄他鄉  
秋草爲誰綠菊花空自黃  
南樓數行鴈多事叫煙霜  
自愛花龕隱閒雲冷古苔  
已判重九過誰遣白衣來  
避世真名士憐君只不才  
蟹肥桑落美重約草堂開

王仲山青溪漁父圖

愛此清江水飄然一葉舟  
心隨雲不定天與水空流  
蓑笠晴兼雨風波春復秋  
翻疑嚴瀨上多事著羊裘

茗溪舟中爲禹徵二姪題畫二首

疎樹直穿雲際小亭斜  
傍溪灣今日白蘋洲上青尊同  
爾看山

客裏棲心翰墨攜來贈汝  
新詩歸去草堂春暮酒香茶  
熟開時

蓮花莊故址三首

莊爲趙文敏公故居

江南春老白蘋洲  
莽漾風前一葉舟  
惆悵王孫舊池館  
垂楊深處宿沙鷗



蓮花莊上幾經過宿雨荒煙滿碧波却怪拏魚雙槳女  
對人猶唱采蓮歌

浪遊到處儘酸涼花落汀洲水亦香他日買山先買水  
白蘋紅蓼結書堂

畫溪黎雲

花影溪光總不分畫溪一片白紛紛飄蕭半作風前雪  
蕩漾全疑水面雲深夜最宜沉素月密林何處漏斜曛  
惟應冷入騷人夢怪底流鶯隔樹聞

春湖和趙驂期中翰

歌管樓臺到眼新春湖隨處總宜人桃花雨打零紅亂

芳草風梳一碧勻嘶馬長隄堪入畫停舟遠水獨尋真  
閒心輸與雙鷗侶冷月寒煙戲綠蘋

春湖答王雄飛疊前韻

又見東風起白蘋韶光到處物華真雨添湖水碧波動  
雲放春山翠黛勻牽斷楊絲橫釣艇驚殘鳥夢喚行人  
近來贏得傷心地紅板橋西別恨新

瓶花齋讌集招同張超然顧俠君洪昉思王赤杼

許莘野項霜田顧天臣汪無亢周層巖王握蒼  
顧搢玉汪陞交次顏家寶崖快亭皖輪分韻得  
深字



小院清幽熱水沉開顏最喜聚同心半簾晴日晚雲捲  
一徑落花春草深醜喚魚英推雅量牋裁桐葉試清吟  
豪情名飲應無匹那羨東山絲竹音

六月一日向功來趙驂期過瓶花齋看菊

豈是神仙瑤圃留更生折向膽瓶幽才經梅雨開三徑  
不待霜風歷九秋花匠幾曾寒礙手酒人先喜醉盈頭  
從今勿復傷遲暮乍一相逢笑未休

九日葛嶺同毛鶴舫陸雲士王丹麓魯齋蘇月槎

諸詞宿用魯齋韻

直上峰巔石級齊秋陰景物覺淒迷一繩沙鴈過湖歇

幾葉山雲入閣低雨漬荒苔丹井上風鳴衰柳斷橋西  
十年重續登高會有客同來數舊題

訪家侍御青壇先生二首

幾年飛夢隔江鄉特地尋君到草堂遽挽青驄情鄭重  
暫停烏榜笑息忙女陽亭下魚鰕市少伯祠邊橘柚莊  
對此不禁頻悵望暮雲低鑠鴈成行

已捧徵書拜 聖恩汀洲何事采芳蓀風鳴春杵連田

舍星散魚曾接水門問字有亭憑客過搜神作記許誰

論無端惜別青溪上遙指西頭黃葉邨

謂孟舉先生

鴛湖席上戲題八首



蘇園全書  
斂雲收霧自生香窄窄衣衫淡淡妝此是當年劉翠翠  
一般風味等樊昌

懊儂自是尋常曲一出朱唇絕可憐不遣琵琶訴明月  
由他一十二回圓

饒伊緩緩整歌喉留客金尊勸不休楊柳城邊月初起  
鴛鴦湖上水空流

轟飲溪堂午夜還曾無飛夢到蓬山輕搖一舸呀啞去  
家住斜塘水一灣

相逢話說古杭州繡幕明瓊第一流記取梅花春色好  
赤闌橋外雪香樓

細髮深盤雲一窩修眉巧作翠雙蛾萍絲撩亂牽人意  
不管春風柳絮多

嫣然雅態是名姝若在西湖合姓蘇十二紅橋歌管地  
風流還似翠香無

偏怪多情若有根香雲低鑠月黃昏逢人休撲桃花扇  
爲爾頻傾竹葉尊

綠萼梅

此是仙人萼綠華偶然乘雪到山家漫持鏡鼻敷銀粉  
欲上釵梁綴玉花月爲洗妝添懶隨風因飄蒂薄蟬紗  
最宜酒罷燈昏後垂下晶簾影半斜



張蘭佩消夏圖二首

灘上石低苔中軟樹頭風起水紋斜幽人向晚不歸去  
坐看夕陽紅藕花

青青修竹閒梧桐不露天光影水中我有清池剛半頃  
與君只隔小橋東

答裴殷玉

江上青山隔海門明月懸思君十年夢逢我暮春天  
尊脆魚方美花飛柳正眠好同鄭谷口

義門瀟灑共陶然

石臣兄葡萄畫卷

筆底有明珠由來自無價一夕西風生離離挂簷下

畫丁香花爲柏侍衛題三首

碧闌干裏小簾櫳紫簇茸翹入畫中記得春風人睡起  
耳邊初挂響丁東

由他金剪妙難裁小墜明璫出杏腮說與仙郎須護惜  
東皇過處紫雲開

雕玉鏤金耳上珍一從相見便生春江南兒女應憐小  
初帶雙鬟欲避人

南巡迎鑾詩四首

翠華重望閱河渠聖主乘陽萬象舒雙雉曉開金羽  
扇六龍春護紫雲車星聯北極環華幄風動南薰拂



綵旗 帝德由來天道合太平今已受圖書

東行青帝發韶華河上春晴麗錦霞白馬沉來平竹箭  
黃龍浮出汎桃花山川組繡三千里雲日瞻依百萬家  
天地平成歸至治 武功文德自無加

英英瑞靄遍和融法古時巡春令中應補一編新禹貢  
猶圖七月舊豳風麥因捲浪平鋪綠魚爲浮陽早躍紅  
今日雍熙知莫並祇緣民隱徹 宸聰

警蹕傳呼萬姓迎龍蔥佳氣接神京即徵孝治 慈宮  
命爲省農功 御駕行草木榮滋隨玉輦雲煙色麗繞  
霓旌遙聽仙樂來天際應是簫韶奏九成

乙酉四月十日

上自西湖回鑾

臣焯

於杭關謝邨送

駕蒙

賜御箭

命赴吳門

行宮至十八日辭歸恭進紀

恩詩八首

西子湖頭盪彩橈樓臺影入鏡中遙留 鑾萬姓懽騰  
日聲溢春波十二橋

御駕傳歸萬隊行杭關水次拜龍旌承 恩寵錫雕翎

箭又向吳閭 輦下迎

郎官 封敕賜嚴親幸上春臺已八旬今日忽蒙 親

召問 主恩重沐一番新

碧水溶溶漾細波百花洲上鳳船過江城一片深垂柳



知是春風雨露多

草澤謳吟愧不才微名卷帙 御前開鳧鷖濫入鷓鴣

隊同向 宮門聽鑰來

珠斗闌干玉漏沉日邊遙望 九重深里詞入薦從黃

閣 天語傳來自翰林

江南沃野遍桑麻水郭山邨望 翠華况是清和逢月

閨信風才到殿春花

旌旗前指 幸金陵江上檣帆映水澄縹緲瞻雲依北

向瞳矓就日仰東升

法螺

法螺精舍好一徑蹋平沙池雨萍紋細山風鳥路斜籬  
穿稚子竹庭放女郎花愛酌清泉味茶煙颺碧紗

千尺雪

一道奔流水淙淙晝夜鳴寒雲常不散殘雪幾時晴激  
石憑風勒穿松挾雨爭幽人於此住吾亦悔勞生

靈巖

獨上靈巖寺開軒入望多雲青雙岫色煙白一湖波澗  
水沉魚鼓松枝亞蕙蘿閒行應未倦隨意坐陂陀

琴臺

徑曲隨飛鳥峰危似落星琴臺一片石何處憶娉婷淶



水爲誰怨春山空自青東風吹客夢殘醉未曾醒

穹窿

天半望穹窿輕輿度碧空陰崖風雨暗藏室鬼神通石  
級青林裏香雲翠靄中丹砂人老去何處訪仙翁

鄧尉山

作客身偏逸看山意轉親牽衣胷薇刺信手摘梅仁碧  
草雨餘滑清鐘日暮頻芙蓉七十二繚繞太湖濱

白雲泉

青山高不極遠在白雲顛不見青山老白雲長千年山  
氣合爲雨雲聲流作泉疑泉亦疑雨終日響潺湲

鄒念尊太湖采蓴圖

青絲蕭散綠波空鴨背船輕采露叢正值水香春雨後  
洞庭山下白蘋風

虎丘舟中同鄭義門

東風縱艇更何之忽傍山塘繫柳絲客不逢春花信後  
人當散市日斜時但澆淶酒真孃墓誰薦青蘋伍相祠  
今夜吳洲漫惆悵與君乘月且吟詩

寶崖兄桐陰點筆圖

秋聲動地來秋葉不知老恰值高吟時肯使堆霜草  
畫石贈石臣兄時從黃山還



蘇東坡詩集卷之三  
偶然著筆亦玲瓏此是蓮花第幾峰待我明年消夏去  
看他三十六芙蓉

書藍田叔畫蘭卷後贈石臣兄二首

斷葉零香三五筆坐令觀者笑離奇空山盡日無人到  
花落花開誰得知

如君潑墨有餘情妙手天然愛寫生今夜底須頻索玩  
豆花棚下月三更

答韓寄菴

煙霜五載隔鱗鴻人在湘江東復東今日相逢追往事  
西風湖外藕花紅

蔣靜山秋吟圖

閣筆沉吟知未休苔牋輕拂翠雲流水紋瑟瑟鴈初下  
梧葉青青風已秋

陳楚白漱香圖

青鴉露滴汎雲瀾捧出紅甌春筍寒濼濼香新融豆蔻  
翳翳翠薄影琅玕人如南國何曾見客到西園莫誤看  
最是落花風過處畫師著筆也應難

乙酉園中硃卷爲同考吳江廣文夏虛舟先生所

薦賦呈八首

三年一戰頓成空葑菲何因入采中桃李新陰初滿客



萍蓬舊迹亦從公徒勞鱣尾魚迴浪漸老霜翎鶴墜風  
猶說東南有竹箭無人收拾在荒叢

曾傳淝水碧泠泠爲有名儒識地靈曼倩當時誇射策  
子雲今日愛談經月中白桂分靈鷲江上丹楓接洞庭  
自分不才當棄置休從門下笑通苓

棲屑名場詩一瓢矜才未敢學題橋棗當投處心先赤  
桐到彈時尾又焦京國鷓鴣違故舊江城風雨度昏朝  
書生落魄尋常事磊隗何須藉酒澆

蠟炬高光護絳紗迂疎弟子愧侯芭而今始信頭難點  
在昔空教手漫叉自怪明珠同意苴誰憐良玉混蒹葭

戰場回首成陳跡愁聽西風叫暮鴉

何事年來百慮侵時時抱膝獨長吟帶經未了兒寬志  
感遇徒傷周處心顧我生花終是夢憑他惜墨竟如金  
尋思凡骨無由換誰到羅天問信音

官燭風零午夜交可堪席舍網蟪蛄開行不惑經三字

占卦須參漸六爻才調曾傳蘇軾轍科名空說宋祁郊

生憎兄弟偏同氣一架藤荒兩繫匏

舍弟問郊以麟經爲青田鄭邑侯所薦同被放

惆悵平生計總非不關花樣與時違珠離海室潛蛟遁  
草殺沙場逸馬歸席帽豈殊新箬笠綈袍終遜舊荷衣  
太常近日稱知己洛下何緣賞陸機



浪傳名姓挂詞壇此筆曾經賦彩鸞柰爾齊門猶鼓瑟  
何人漢殿更焚蘭一雉易脫囊中穎九轉難成鼎內丹  
眊矐不堪還侍坐感君青眼一相看

江上

細草如煙一道斜無邊春色落誰家黃鶯啼徹無人見  
江上東風吹柳花

曾記

曾記朱闌護碧紗明燈扶醉撥琵琶重來只有雙飛燕  
深巷無人草自花

竹墩訪沈厚餘留飲賜書堂

輕帆徑指水雲隈蟹舍漁莊曲曲迴竹葉那辭今日醉  
梅花偏待故人開儲端東國承新詔尊人懷庭宮詹奉命  
校全唐詩集於揚州公  
子西園騁上才尋遍垞南還垞北此行知爲輞川來

雉城訪萬玉菴古梅花殘矣二首

尋花特地到深邨零落繁香掩寺門儘受塵沙忘歲久  
不隨草木待春溫雪霜催老孤臣骨風月生離倩女魂  
無限相思一相顧琉璃燈下立黃昏

酒醒夢覺太酸涼愁對東風卸玉妝既不許人窺歲月  
如何與客暗參商擎蒼剩有虬鱗骨洗白全無獺髓方  
獨倚闌干漫惆悵回頭色相問空王



答贈徐象求

茗椀爐香日憶君，一家詞賦最清芬。  
桐花徑曲來青鳳，杜若洲深漾白雲。  
問訊常從支遁寺，悟菴上人相逢猶記鄂王墳。  
別來幾汎茗溪櫂，悵望津南一水分。

西湖讌集答徐象求

老去春光爲客留，赤闌橋外聽鳴騶。  
晴山雲綰青螺髻，野水風翻綠鴨頭。  
靜裏聞鐘尋竹寺，酒邊得句倚蘭舟。  
相看却喜皆年少，會向南皮結勝遊。

畫竹寄吳興友人二首

碧草殘碑文與可，青苔斷壁管夫人。  
都是吳興舊名物，

越看越久越精神

春風剪剪雨絲絲，屋角新抽綠玉時。  
記得白蘋洲上渡，漁郎唱徹竹枝詞。

畫草

花盡空餘草草深，亦自花滿園飛蝶。  
蝶無夢落天涯，

紫白山人松根把卷圖二首

青山何處是金精，愛向松根采茯苓。  
檢點洞天兼福地，掌中七十二圖經。

何必方壺占釣磯，空山景物有光輝。  
松花應是仙人粟，香雨惺忪落滿衣。



寄題張銘軒山樓二首

遠寄詩筒疊倡酬何當攜酒共清遊乍看畫棟山雲暖  
忽捲斑簾老樹秋江上誅茅懷杜甫門前釣水問裴休  
元龍百尺干霄漢豈羨東陽八詠樓

春煙秋雨總佳時素壁銀牋絕妙詞花草盡成機上錦  
樓臺都是畫中詩風吹石鼎迴香篆月上桐床理玉絲  
我亦閒園剛十畝叢荒何日理茅茨

項霜田秋樹讀書圖二首

小疊雲根拂紫苔手持一卷兩眉開祇緣獨樹撐天出  
不覺西風動地來垂老虞卿猶著述感時庾信但悲哀

秋坪亂草無人迹竟日遲留不肯回  
蟋蟀聲輕秋氣微偶逢秋樹思依依琴尊瀟灑人猶爾  
裘馬清狂事已非草木黃時杓北指江湖白處鴈南飛  
雄心一點難磨滅兀坐無言對落暉

湖上晚歸同汪次顏

柳隄煙鎖半淒迷掠盡殘陽野鶴啼月靨一輪紅琥珀  
風衣千片碧玻璃

上相國京江張夫子百二十韻

帝世鈞衡重清時位育全乘雲升壽域輔日麗瑤天鳳  
曆千秋紀龍星一道躔弘猷方鼎鼎大業自乾乾寶籙



匡君德金甌卜相賢 宸衷叅密勿 廟略首旬宣  
民隱周如洞 天心轉若園棟梁推獨任柱石永無竣  
補袞勤千綫披琴佐五絃剛柔兼體用才德互經權華  
夏康黎庶成周廣幅幘九州歸化理百辟總衡銓寵押  
珊瑚印恩親玳瑁筵 禁中題錦荔 殿上撤金蓮點  
漏宵留鑰鳴鐘曉促韉公朝歸獨後私第出當先光輔  
王言獎調元 帝命專明良關世運忠愛本天緣盛業  
今如此名賢非偶然地維靈嶽瀆星象粲璣璇豫定三  
千禮猶占五百年赤虹巖產璞明月海生蟻威鳳真時  
瑞麒麟豈代傳畫梁芝早秀錦砌鶴先眠天韻青槐響

金陵紅藥媽南徐羅綺麗北固鬱蔥芊山謂無雙景江  
名第一泉清芬原累葉甲第自連縣虎榜推名士鸞坡  
羨淑員文章開八代經史會千川法度傳先輩沖虛悟  
太御性情融妙諦理學貫真詮巨浪詞源倒雕雲思緒  
騫規模多卓犖文采少嫵媚白鳳胸中吐丹霞夢裏纏  
匹如珠萬斛有若錦千純論史鍾鏞奏談經琬琰鐫龍  
門開峻聳禹穴任漁畋氣作銀潢瀉名高寶月縣北門  
恒視草東觀久憑旃蘭簡香光動芝泥彩色鮮金華簪  
簇簇瓊竿酒芟芟瑣院靈翔鵲經筵兆集鱣但誇騎杏  
葉不待數花塼心是孤懸鏡身同百鍊鉛祇今重紫



誥論世一青氈名父聲華盛賢兄冠蓋連奎明元解領  
雲奏榜名填桂蕊原同結棠花喜共奪一從窺展驥自  
此聽聯蟬選士來吳會觀風下越舷開庭盡桃李收籠  
是蘭荃望重南宮試光臨北斗聯秉心堅竹柏持節矢  
冰淵誰後周生橐同誇祖逖鞭北征驅虎豹大狩獵鷹  
鷗韜略談戎幕紆籌理鐵駟黃塵銷劒戟青海掩矛鉞  
文武才非二英雄事豈孱中間曾返駕暫爾托歸田裙  
屐攜歌席琴尊載畫船閒情偕鹿豕靜息樂魚鳶上溯  
三清道平叅一指禪紫鸞衣照灼朱鳥駕翩翹樓倚青  
林障堂成綠野椽棋枰揮麈尾石鼎熬龍涎花褥紅茵

厚松棚翠蓋圓但嗤金谷麗肯學輞川妍竹杖行應捷  
莎裳手自褰金焦環錦繡南北控喉咽銘鶴何從訪遊  
龍幾度穿每收囊裏句不忘杖頭錢水暖尋魚舍風晴  
度麥阡滄江撫圖書黃海莽雲煙掃石頻留坐看山必  
極巔遊從名賞處心若擬終焉忍負蒼生望應看黃閣  
旋三台瞻朗耀九命益深虔朝野咨詢遍堂廉禮數捐  
宮庭移步輦 禁苑夙花駘默運民風古光昭王路平  
不令敲有器惟祇直如弦喬木陰垂廣冰壺色映堅門  
依閒鳥雀帳不列花鈿露液沾膏沐涇流繞激漩商霖  
方總職藝苑且章編國史綜三館輿圖考八埏行文飛



兔管搜韻鎖魚筌墨浪臨池潑硃光  
滴露研預規金鑑錄首和柏梁篇  
載考經綸業多緣運會偏臯夔方  
協贊岳牧始安便山甫猶縫闕元  
公久未還蕭曹原接踵李陸但相  
沿謝傅情稱矯梁公行若愆車攻  
詩慷慨霖雨字蜿蜒出鎮同分守  
巡方爲撫邊天禧才一紀興國倏  
三遷或際雲雷會徒邀風雨俊艱  
難多創建匡諫費憂煎致主真非  
易惟公一盡蠲神堯方望秩大禹  
尚勞胼方略煩區畫訐謨更謹拳  
陪巡時燕語扈蹕幾征遒雅肅西  
清望曾邀東閣延儒林無拒絕賤  
子自拘攣謬廁橫經列親承問字  
前敢云蒙吐握私幸藉鈞甄

鼓空餘噪龍威偶冀憐行臺隨霧  
密茂苑聽雷駢恩錫雕翎箭光分  
魚子牋知非櫪下駿尚作井中蛭  
白璧寧同趙黃金豈慕燕蒲繩纏  
兩足鶉結綻雙肩日月依光切雲  
山入夢牽樗材沾潤澤萍梗濯清  
漣天祿籤頻典扶風燭再燃舒眉  
詞雜沓拜手舞蹁躑雅頌詩三百  
春秋歲八千明君佐賢聖宰相即  
神仙

泥美人次震六上人韻

信手搏來即便工駢肩倚立笑春  
風縱饒粉澤千般膩祇少靈犀一  
點通柳絮沾時渾是夢蟬花落處  
總成空入宮似爾應生妒付與心  
香不二中



送震六上人還南海三首

相逢客裏太怱怱，又值歸人惜別中。  
記得惠山山下路，香林翠隊笑春風。

每看搖筆便成詩，此別應深別後思。  
莫怪姊歸啼太苦，無端花亦放將離。

鶯花繡錯古揚州，錦障華燈月下遊。  
一蹋蘆枝空色相，海門風起白潮頭。

送陸鶴亭之孝豐廣文次留別韻四首

河橋惜別柳蕭疎，檢點行裝幾輛書。  
壯志嶙峋聊復爾，名山事業更何如。  
宮牆桃豔回銀海，泮水芹香透玉廬。

待得乘風春浪暖，龍津一道接姑餘。

曲水園林幾夢思，夢邊月下憶微之。  
相逢雨熟黃梅後，此去花香紅藕時。  
照古燈縣金鳳脰，量才尺倚玉羊脂。  
分飛鶯燕渾無賴，垂翅吾猶守一枝。

溪山面面有雲征，好葺齋廬力自營。  
不少侯芭爲弟子，應誇韓愈作先生。  
一官國事兼家事，百里山程帶水程。  
聞近雪川梅似雪，板輿扶取看花行。

月泉壇坫舊聲聞，詞藻清如蘭蕊薰。  
祇自擔才容一石，更誰提筆掃千軍。  
祿微儘足供名士，官冷何妨是廣文。  
珍重臨岐數行酒，西山鸞鶴戀同羣。



寄題徐廷一園亭

重陽仙觀識君時，拂几先披絕妙辭。  
入意雲山勞夢想，動人風月已心知。  
魚英琰上園中景，金屑泉邊畫裏詩。  
待與毛公鶴舫先生尋舊約，閒攜杖屨到清池。

跋沈殊亭西湖詩集

不數尋春杜牧之，紅牙都唱沈郎詩。  
江山無恙才人老，惆悵旗亭下雪時。

白翎新曲最浸淫，誰向嵯峨試古音。  
君是當年楊鐵史，東風吹笛作龍吟。

跋王鍾玉惹憐詞

蕭瑟秋聲酒滿卮，披君一卷惹憐詞。  
才經黛筆新描處，却似華鬢未結時。  
騷客香心多寄託，美人花影動相思。  
玉緘會達蓬山去，雲海何勞怨鶴遲。

一片雲石二首

蒼然一片雲，何年出山谷。  
一出不知歸，宿我蘿花屋。  
豈是天上星，不作天下雨。  
池亭風月古，相看吾與女。

憶杖圖二首

山陰戴易南枝隱，虎丘僧舍自稱西。  
照頭陀康熙戊寅，余遇於半塘南枝。  
拄華山竹杖，上有銘銘曰：請將孤竹先朝客，扶老於今八十春。  
幾度可中亭上望，千山明月。



獨歸人南枝善八分長於鐵筆銘故自鐫也後二年來  
遊湖上余招飲湖樓南枝顧余有欲杖色乃曰此老人  
扶持物也終當以貽君逾年南枝卒余訪其家竟得之  
後王舍人赤杼見索甚力不得已歸於王未幾王亦卒  
是杖也存沒之感兩繫焉而余尤不能忘情於斯杖者  
南枝生時之許身後之與也負斯杖是負南枝也因寫  
爲圖題曰憶杖繫以詩

南枝遇我山塘道支却華山綠玉柯那識子仙仙去後  
春風入手重摩挲

晶熒直與鰕鬚似瘦削還疑鶴膝同不信是龍終化去

長房枉自遇壺公

謝王獻斯姊聳貽端江研四首

潤於蓮葉初離水嫩比蕉芽乍放春曉起一天風過處  
碧池春水浸魚鱗

書林不數陶學士武庫但說王將軍恨不相隨度嶺外  
金刀手割洞中雲

猶看生質帶雲煙一上渝麋一倍鮮不羨雄雉與雌綬  
故人袍色總依然

昔年仗節出端溪今日投簪歛縣西可便聞來修研史  
請增龍尾碧玻璃



贈家師石

五種聲歌到處傳

令祖石渠先生作  
梨花五種傳奇

玉簫金管憶當年來尋

池館花陰地去看雲山雪意天東閣無人常寂寂西園  
有客自翩翩消魂復譜楊枝曲待向春湖整繡鞵

度歲雜感十六首

東坡有云歲行盡矣紙窗竹屋燈火青熒每於此間得  
少佳趣余遭逢急難自秋徂冬奔走百四十日當此度  
歲餘閒回憶一年中間見閱歷有所感有所不必感凡  
得詩如干首嗟乎蒼蠅之聲蚯蚓之鳴物之情也非有  
感也雖然物不得其平則鳴心有所感發而為聲詩故

聲也作詩者其不平乎

休將聲迹歎沉淪落魄終成自在身過去年華空蹴蹋  
嘗來世味太酸辛醉鄉日月能容我韻語陽秋解笑人  
滿目浮雲多變幻煙花南國已成塵

結客平生意氣豪逢場雖戲苦相遭羅山那見羅高鳳  
釣水何曾釣巨鼇前去累輕如葉脫近來心細若絲縲  
無端喜極翻愁絕攬鏡鬢髮已二毛

衫襟只怪淚痕多不為悲秋哭當歌若使聞蟬解知了  
無煩種樹識如何石填東海應憐爾霧隱南山莫怪他  
老我風波安足惜少年心性合消磨



古語難爲牆上趨吉凶鴉鵲豈同塗青著有準從誰揲  
紫竹通靈每自扶木枕敲時心易警爐灰畫盡計難圖  
中流船失君知否悔不千金買一壺

何處空山可避喧世情翻覆雨雲繁鍛翎老鳳因棲棘  
羸角羝羊爲觸藩越國豈能忘所報秦人適不用吾言  
池魚林木非無故一火星星可燎原

當頭歷歷九疑峰未識來蹤認去蹤笑爾不成終畫虎  
隨他有技欲屠龍攢眉累日寬衣帶瞪目常時淬劍鋒  
每到夜分愁百結寒燈一穗夢惺忪

一隙流光袞袞塵歲華又是一番新梅花雪破簷前牖

松葉光浮甕底春綵勝曉迎青太乙名香暗卜紫姑神  
三竿紅日東風暖最喜新晴趁此晨  
一年回首太匆匆領略餘閒此日中簾捲天光湘水綠  
盤堆春色洞庭紅柳開陽面初迎日蘭動香心早破風  
最喜環爐爇松火一家兒女笑言同

休嫌落薄滯江干親老兒雛罄室歡風裏馬牛應不及  
雲中雞犬亦相安幾頭小飲看天晚雙尾橫吹向夜闌  
近結冬花亭子好坐銷殘牖不知寒

棲息猶如戢羽禽雄心壯歲併銷沉風和黍谷方吹管  
雨浥蔬畦好播琴半壁雲山張古畫一庭竹石伴清吟



乘閑陡覺身安穩奔走西風直至今  
秋來頻過鄂王祠碑版猶傳賜宅時  
虎攫龍拏沉赤縣  
天荒地老失金支心枯古柏霜侵久  
骨冷寒泉月到遲  
星斗雷霆冤獄在風波亭畔不勝悲  
去年夏旱爲憂蝗靈雨今春爛麥秧  
漢世只聞連月澇  
堯時不道累年荒漕官有命回芻舳  
農部頻傳給社倉  
盱食宵衣勞 聖主幾回恩詔下明光  
每爲天公多殷憂綠章封簡費深籌  
蝦蟇厭物豈足齒  
蟣蝨小臣頻叩頭主酒爲旗吾所樂  
借錢供織爾何求  
請看黃土搏成後誰見媧皇鍊石留

華堂不放酒尊空擊碎珊瑚席未終  
莫倚少爲無賴賊  
須知人是可憐蟲生成天地牢籠裏  
顛倒衣冠戲局中  
鐵槊凋弓俱已矣更於何處說英雄

故人三載去京華西笑長安好作家  
不信天關環虎豹  
肯從地窟辨龍蛇留賓誰設陳蕃榻  
懷刺難逢郭泰車  
可惜拋荒舊壇坫飄零雲雨各天涯

抖擻風衣走路傍泥塗非復舊膏梁  
自憐草是小人德  
誰惜蘭爲王者香往事只如雲莫測  
閒情應與日俱長  
東皇可也隨人意盍盍春和到畫堂

畫蘭絕句



幽蘭本是山中草說與山人笑不休苦被春風勾引出  
和蔥和菜賣街頭

沈斐英照三首

水光雲景兩交加日射金鱗一道斜如葉小舟天上坐  
風頭吹亂玉梨花

瑤草瓊沙歲幾千一行蒼筆帶雲鐫笑君只記來時路  
老却巖花閉洞天

銷夏今年住鉢池茶煙禪榻夢涼時華胥有國吾曾到  
跨上青鸞總不知

落梅同金仰亭朱贊皇舍弟晚輪分韻

似雪飄蕭不肯停曉寒深處玉行伶簾開畫閣妝初點  
月落花林夢乍醒香散漸看春盎盎燈銷徐覺影星星  
東風莫遣飛來急留向江城笛裏聽

王恂菴石榴蓮蓬圖二首

同是香心早結房西風昨夜過銀塘石家醋醋休相笑  
新襞仙裙倚六郎

東林南海種如何何事王生苦憶他若到燕京秋果熟  
上方仙品重蘋漙

查二瞻臨米畫冊二首

復到蘋鄉又隔年牡丹風過落花天尋春只怪多風雨



重展雲山意快然

試看靉靄雲迷眼祇覺清冷月滿懷却笑老顛翻墨汁  
如何圖取鳳皇鞵

胡容安與女史堵心霞合畫花卉冊

童史江南稱畫逸鵬雲舊記屬君家西湖十二橋頭水  
流盡落紅無數花

寫柳圖送戴右衡

江津楊柳絲千萬不繫君家白玉驄今日君從江上去  
漫天飛雪正東風

畫鳳仙花二首

微著霜豪景致幽西風點綴一庭秋拖將綵纈霞沉閣  
吹徹簫聲月午樓有色好浮銀鑿落無香偏壓玉搔頭  
宮閨兒女休相笑乞與金盆搥得不  
乍一相逢莫漫猜如生妙手絕塵埃曾無綵翼歸蓬島  
空有香鱗貼露臺雨濕但憐根脆弱風搖常並葉裴回  
生憎甘逐閒花草零亂秋叢只自開

沈殊亭照

坐倚石為床琴尊紛在傍時光分草木秋氣入金商靜  
裏聽流水吟邊戀夕陽祇應忘歲月鬢鬢已蒼浪

潮音寺次何旋吉明府韻



曾訪支郎此寺中平沙樓閣勢偏雄綠窗薜荔青留雨  
鎖徑篔簹翠疊風漏定六時潮上下山分雙黛浙西東  
把詩吟罷成追憶雲暗江城思不窮

鐵夫和上雲根道影二首

曾住焦先第一峰禪關花木幾春冬兜羅界裏無餘物  
圓定光中有此容龍腦漫持新賜鉢鰕鬚常伴舊支筇  
來年擬放江心櫂尋著雲根認去蹤  
花香正及木犀時禪榻西風感鬢絲一笠圓青神與瘦  
片苔寒碧坐相宜蓮堂有地留初相蘭若何緣遇舊知  
分付緜雲三萬頃爲師供養莫差池

鑿閣五首

閣爲嚴太常汝肅先生所創僅一層名爲閣而實非閣  
也舊東向余撤其後垣增二椽兼使西向其傍疊石爲  
陂陀緣級而升面對小山高下層疊其南累石爲隄繚  
以竹籬雜植松桂梧柳地不過十弓居然巖壑之勢具  
焉此閣創明萬曆間歷今百餘年余復葺而新之仍以  
鑿閣名康熙己丑八月

墻東修築隱深阿略比維摩十笏過約束身心應愛小  
經營竹木不求多壁中滿幅山河壯梁上一盤星斗羅  
舊日蘿花今鑿閣也稱安樂兩行窩



明窗亮格面西陽貪看殘霞映矮墻豈謂飛騰憐莫景  
祇因蕭瑟戀餘光月生每自金方上風至偏催玉露涼  
更向東頭留戶牖好教晨色到眠床

新榜仍題鑒閣名昔人鑿物有深情妍媸互列從誰判  
豪髮爭差暗自驚燭眼可能犀照灼觀心宜似水空明  
清光只恐塵埃蔽莫使昏昏過此生

何必名居似輞川一椽棲息儘清便無官石敢稱三品  
有壽松教養百年舊置爐瓶多古色新安床几亦天然  
秋深別有閒風景朱橘黃橙樹樹鮮

莫道家居近市闌數弓眠鹿有餘閒未開泉水通雙脈  
故築沙隄轉一彎小結團圞窗似月略分高下石爲山  
隔墻更補深深竹好與幽禽日往還

題朱道周詩集

江北江南載酒游最勾留處是杭州西風河水菰蘆雪  
落日吳山鴻鴈秋愛爨長牋魚子細閒拈彩筆兔豪柔  
讓君如許雕雲手他日聲光在鳳樓

顧餘冬對鏡自寫影三首

自將妙筆寫孤蹤風月襟懷冰雪容贏得旁觀皆絕倒  
鬚公影在碧芙蓉

世上應無可畫人也如清閼自傳真墨花零亂琉璃硯



剪出雙瞳秋水神

漫向道邊逢麴車相從幾夕醉紅牙笑君不飲竟歸去  
辜負滿頭黃菊花

客壺山草堂與雪園兄夜話二首

不到吳閩已四年草堂風景故依然瓦尊銅鼎無新物  
鳳竹龍松有舊緣蕭散那知星是客清冷祇愛月常圓  
家鄉况復來兄弟同宿壺山小洞天

時快亭  
兄適至

相逢且莫話從頭無賴心情此出遊祇怪陸龍仍善笑  
何因庾信近多愁由來雲氣成蒼狗慣是才人狎白鷗  
五十功名天府籍猶勞持斧月中修

兄近貢  
於鄉

夜上虎丘寺二首

野步山塘夜色涼寺門路黑轉迴廊漸看金爵瓊樓宿  
忽放銅盤璧月光露出龕燈時隱現傳來劒氣久微茫  
惟留孤塔穿雲頂猶說蕭梁古道場

不問茶甌與酒卮夜深風味澹如斯坐知露濕盤陀石  
行見煙籠短簿祠西照草荒傷故友

謂戴  
南枝

東林花發叩禪

師

南海素文長  
老今居虎丘

一遊一度成追憶愁對清霜拂鬢絲

陳遺山招飲觀劇十二首

木落江天朔氣寒兩床絲竹酒汎瀾從知法部誇江左  
翎雀新聲莫浪彈



煖閣留歡客似雲綠尊紅燭喜從君今宵參佐橋邊月  
偏許西鄰一半分

平生花月最情牽左右風懷絕可憐客到西園留午夜  
人逢南國正丁年

漂花浪蕊去參差紅豆休拋綠玉池曾是錦鴛三十六  
風前誰復辨雄雌

元朝院本漢中郎古柳殘邨說戲場牛女不須猜讒語  
驂騑失意在康莊

香燼鐘殘月滿扉凡心一動道心微雕籠鸚鵡偏提恨  
喚取蓮花女道衣

人情冷煖水中泡看徹人情廣絕交葛帔祇今誰慰藉  
故人門外漫相嘲

紅泉玉茗譜春詞一段春心懶自支不用東方懷夢草  
美人花影動相思

蛾眉手格九重泉畫裏英姿憶老蓮一樹穠花生委地  
零膏不獨步非煙

西江風浪一維舟璧月重圓總淚流井底老蛟休夜舞  
精靈猶說在溫州

縱酒徵歌樂事舒箏絲鼓箭夜徐徐不愁月冷霜飛候  
直到參橫斗轉餘



小部梨園昔夢殊風流大抵屬吳趨他時若譜雲煙錄  
好載江南夜燕圖

寒月芳潤堂分賦

向夜空庭荇藻開冷光流露濕蒼苔但看圍徑三千里  
不覺團圓十二回青女無衣銀粟粟素娥有樹雪皚皚  
瑤階玉戶尋常見只愧清淮作賦才

芳潤堂看牡丹同蔣芳似金最木朱贊皇秦函三

含貞繆敬思朝曦家學山分韻

尋芳取次到江南高館穠花喜共探半角夕陽開繡幕  
一叢春色結珠龕玉牌那羨標名異金斗何妨喚客酣

昨夜琉璃池上過空教冷豔鎖茅菴

晴窗齊爲拓雲藍紅玉盤中宿露含護影可添屏六六  
飛香已滿徑三三酒濃早沁詩人筆花重難橫玉女簪  
惆悵一年春老去且賒風月共清談

爲劉新堂題其尊人葵符先生遺照二首

玉雪高風我待尋溪橋十里水雲沉逢君話說傷心處  
花落墓門春草深

由來蒙謗有高賢古貌今看恰宛然請與君家徵漢史  
明珠薏苡痛當年

九日陳遺山招集虎丘舟中四首



秋深重到館娃宮  
采椽尊開素友同  
碧草黃花山徑側  
笛床燈舫雨聲中  
袖迴薄影留寒翠  
酒上微潮印淺紅  
只訝年來潘鬢改  
相逢蕭瑟對西風

曲子休歌金縷衣  
藏鈎射覆醉成圍  
酒行眼見螺頻注  
箏促心知鴈獨飛  
小洞天桃斷流水  
大隄垂柳有斜暉  
生憎前度劉郎在  
雲海何曾跨鶴歸

銀絲入饌是王餘  
小鹿花饒刻不如  
姪女好爲觥錄事  
酒人都號麴尚書  
玉纖指嫩何勞戒  
鬧掃窩輕不用梳  
回首高城過夜午  
涼雲雨散碧天虛

曲意難爲窈窕孃  
合歡杯底動參商  
早知蝴蝶生爲夢  
不信芙蓉死抱香  
笑眼無端空似爾  
風心雖在亦何妨  
當筵說與花封令  
留取春陰護海棠

宿壺山草堂浹旬歸後却寄雪園兄二首

問我此來何太暮  
黃花好趁九秋天  
六百千愁向語中  
解三五月從頭上  
圓酒客常留跋燭  
後江光時在廠樓  
前豪吟况復添名飲  
幾日山亭幾畫船

別時春半會秋深  
爲問中間幾素心  
霞氣在天朝忽暮  
人情因雨舊非今  
勤將棧豆收名駿  
懶把園桃飼野禽  
漢室公卿多亞廝  
暮年陸賈有兼金

記夢



琉璃宮闕五雲邊大學親開第一篇  
蟣蝨叩頭臣下地  
雷霆擁足帝中天旋留玉局司香案  
早撤紗籠侍御筵  
他日雲羅緘錦札花磚行迹記苔錢





